

ԼԻԼԻԹ ԳԵՎՈՐԳՅԱՆ
LILIT GEVORGYAN

ՀԱՅՐԵՆԻՔԻ, ՄԻՐՈՒ ԵՎ ԲՆՈՒԹՅԱՆ ԹԵՄԱՆԵՐԸ
ՍԿՐՏԻՉ ՊԵՇԻԿԹԱՇԼՅԱՆԻ ՔՆԱՐԵՐԳՈՒԹՅԱՆ ՄԵՋ

Անցյալի գնահատման մեր օրերում այդ արժեքներից շատերը նոր իմաստ ու նշանակություն են ձեռք բերում՝ ստանալով արդիական հնչեղություն: Դրանցից է Մկրտիչ Պեշիկթաշյանի քնարերգությունը, որ հեռվից հեռու անմիջականորեն արձագանքում է ժամանակակից հայ կյանքը հուզող հրատապ խնդիրներից առնվազն երկուսին: Բանաստեղծի ոգեշունչ հայրենասիրական երգերը, հատկապես Ձեյթունյան շարքը, միանգամայն համահունչ են պետական անկախության ու ազգային ինքնության համար մաքառող մեր ժողովրդի արդիական հոգեբանությանն ու տրամադրություններին, իսկ նրա բներգության ու սիրերգության սրտահուզ նվագները գեղեցիկի ու սիրո պատգամաբեր կարող են լինել հոգու սովի մեջ հայտնված այսօրվա մարդու համար...

Պեշիկթաշյանի գրական ժառանգությունը ծավալով մեծ չեմոտ վեց տասնյակ բանաստեղծություններ, չորս դրամա՝ պատմական սյուժեով, մի քանի ճառեր և հոդվածներ: Ամենաարժեքավորը բանաստեղծություններն են, որոնք իրենց թեմատիկայով, խոր գաղափարայնությամբ ու բարձր արվեստով երևույթ են հայ քնարերգության պատմության մեջ:

Պեշիկթաշյանի բանաստեղծական հետաքրքրություններն ու ճաշակը ձևավորվել են Մուրադ-Ռափայելյան վարժարանում միախառնյալ հայրերի միջավայրում, ուստի նրա բանաստեղծություններից կեսից ավելին գրաբարակգու են, աշխարհաբար երգերն էլ գրաբարյան լեզվամտածողության նկատելի կնիքն են կրում: Դրանցից, սակայն, չի թուլանում այդ երգերի գեղարվեստական հմայքը, այն հետաքրքրությունն ու հիացմունքը, որ ցուցաբերում էին ժամանակակիցները դրանց նկատմամբ: Պատճառն այն է, որ բանաստեղծը նրբորեն զգում էր ժամանակի ազգային կյանքի զարկերակը, լավ էր ճանաչում լուսավորական դարաշրջանի մարդու հոգեբանությունը, նրա զգացմունքների ու խոհերի աշխարհը և քնարերգության հավերժական թեմաները՝ հայրենիք, սեր, բնություն, կարողանում էր հնչեցնել այդ աշխարհին սրտամոտ ռիթմով ու շեշտերով: Այսօրվա հայ մարդը իր առջև ծառացած մարտահրավերներով, իր երազանքներով, հույսերով ու սպասելիքներով շատ չի տարբերվում Պեշիկթաշյանի դարաշրջանի մարդուց, այսօր էլ աշխարհասփյուռ հայը հայրենիքի կարոտ ունի, այսօր էլ

հարկադրված է զենքով պայքարելու իր հողի ու ինքնության համար, այսօր էլ երագում է միասնությունն ու համագգային եղբայրությունը: Ուստի Պեշիկթաշյանի երգերը, իրենց մեկուկեսդարյա հնությամբ հանդերձ, դեռ ասելիք ունեն մեզ...

Հայրենիքի թեման ամենատարածվածն էր 19-րդ դարի 50-60-ական թվականների հայոց բանաստեղծության մեջ: Գրում էին հայրենիքի անցյալի, ներկայի, ապագայի հեռանկարների, ազատության երագների մասին: Ստեղծվել էր չափածո հրապարակախոսության յուրօրինակ մի ժանրատեսակ, որի համատարած հոսքի մեջ քիչ էին իսկական գեղարվեստական արժեքները: Այդ քչերից են Պեշիկթաշյանի հայրենասիրական քնարերգության լավագույն եջերը:

Հայրենասիրությունը Պեշիկթաշյանի բանաստեղծություններում խորապես անձնականացված քնարական զգացմունք է, որ հնչում է սրտառուչ մեղեդայնությամբ: Բանաստեղծն օժտված էր նաև երաժշտական ձիրքով և մասնակցել է իր տեքստերով երգերի ստեղծմանը: Ավելին, իր բանաստեղծություններից շատերը կառուցել է երգային սկզբունքով՝ բանաստեղծական տողի հնչեղ ներդաշնակությամբ, կրկներգերով: Պատահական չէ, որ բանաստեղծության խորագրից հետո հաճախ հանդիպում է <<երգ>> ծանուցումը: Այս սկզբունքով են կառուցված <<Օերն Վանա>>, <<Գարուն>> բանաստեղծությունները, <<Զեյթունյան երգեր>> շարքը:

<<Օերն Վանա>> բանաստեղծությունը հայրենիքի բախտով մտահոգ վանեցի ծերունու սրտաբուխ խոսքն է ուղղված իր դստերը՝ Մեհեկին, որի սիրած տղան <<սիրատարփ կտրիճ Արտակը>>, հրաժարվել է անձնական երջանկությունից՝ հայրենիքի ազատության գործին նվիրվելու համար: Բայց փրկության արշալույսը դեռ հեռու է: Այս ցավոտ գիտակցությունը դառնում է կրկներգ յուրաքանչյուր քառատողից հետո.

Գոց են ամպով աստղունք... և հուս.

Դեռ շատ հեռու է արշույս:

Տխուր հանգերգը, սակայն, բանաստեղծության ավարտին հնչում է հավատի ու հույսի շեշտերով.

Եվ դու, Մեհեկ, կուլա՛ս անհույս.

Ո՛չ, ո՛չ, գնա՛... զա Արշալույս:

Զեյթունյան հերոսամարտի շատ մասին շատ երգեր են հայտնի 50-60-ական թվականների հայ քնարերգության մեջ: Դրանց շարքում առանձնանում են Պեշիկթաշյանի չորս բանաստեղծությունները՝ <<Հայ քաջորդի>>, <<Մահ քաջորդվույն>>, <<Թաղումն քաջ քաջորդվույն>>, <<Հայ քաջուհին>>, որոնք կազմում են <<Զեյթունի երգեր>> շարքը: Բանաստեղծությունները միասնաբար զարգացող սյուժետային գծով ներկայացնում են

յուրօրինակ քնարաեպիկական պոեմ: Առաջին բանաստեղծության մեջ տեսարանի կենտրոնում հայ <<խարտիշագեղ պատանին>> է՝ <<սիրտը ցաված>> և մտախոգ: Ի՞նչ է ուզում նա. <<մեծ, փոթորկյալ ծովի>> մխիթարող հմայքը, զեփյուտի շոյա նքը, երկնքի աստղային ժպիտը, մայրական սիրո սփռված նքը, թե սիրածի <<անուշ զգվանք>>...

Բոլոր այս հարցումներին ի պատասխան կտրուկ հնչում է. <<Կուգեմ վառող և գնդակներ>>: Այսպես բացվում է երգի հղացման խորհուրդը: Հաջորդ բանաստեղծության մեջ տեղի է ունենում հաղթական ճակատամարտ: Թուրքերը պարտվում են: Մահացու վիրավոր հայ պատանին դիմում է մորը, որ չսգա իր մահը. չէ՛ որ դեռ օրորոցում նա պատգամել է իրեն, որ <<կենաց արներ>> զոհի հանուն հայրենիքի:

Ուստի՝

Խաչ մը տնկե վրաս ու դուն

Ուրախ լուրեր տար ի Զեյթուն:

Հաջորդ <<Թաղումն քաջորդվույն>> բանաստեղծությունն ունի <<Պար հայրենակցաց>> ենթավերնագիրը: Ձոռված քաջորդու զինակիցները հողին են հանձնում հերոսի դին: Քնարական պահը ստանում է էպիկական վեհություն: Արտաքին պերճանքից զերծ չափատողերը հնչում են հպարտ տրտմության գերազդեցիկ շեշտերով.

Ոչ փող զարկինք, ոչ արձագանք լեռնասույզ

Մարե ի սար չարագուշակ տարին լուր

Ու չերգեցինք ողբոց երգեր սրտահույզ,

Երբ պատահվույն բացին մոայլ փոսին դուռ:

<<Գիշերային մունջ ստվերները>>, <<լուսնկայի շողերը>> ծածկող <<մթին ամպերը>> ակնածալի զարմանքով իրենց զլուխները խորարհած լեռները, - ամեն ինչ լուծվում է պահի լուռ հանդիսավորության մեջ.

Հայնժամ ցուրտ-ցուրտ հող լեցուցինք յուր վրան.

Խաչ մը դրինք, ինչպես յուր մոր պատվեր ետ

Ոչ ալ շքեղ արձանագիր, ոչ տապան,

Զինքը մենակ թողուցինք յուր փառքին հետ:

Վերջին բանաստեղծության մեջ փոխվում է տրամադրության երանգը: Հայրենի լեռների համայնապատկերի վրա երևում է հայ աղջիկը, բայց ոչ արբենալու համար զարնանային բնության զեղեցկություններով: Ծաղիկների փոխարեն նրա կուրծքը զարդարում է <<բոցանշույլ գրահը>>: Նա շտապում է հայրենիքի ազատության կոչին:

Արիության ու քաջության իր օրինակով նա ոգեշնչում է հայ կտրիճներին: Առջևից սլանում է քաջ <<հայուհին>> <<որպես շանթից հրավառ նիզակ>>: Ճակատամարտն ավարտվում է հաղթանակով: Հայ քաջուհու ճակատին ծաղկեպսակի փոխարեն շողշողում է հաղթության դափնին...

19-րդ դարի 50-60-ական թվականների հայ ազգային գիտակցությունը հակված էր ժողովրդի պատմության աղետալի շրջադարձերը բացատրել զլխավորապես ազգի անմիաբանությամբ: Այդ խնդիրը առանձին սրությամբ դրվում էր կաթոլիկ քարոզիչների պառակտիչ գործունեության ակտիվացման օրերին: Ուժեղ էին նաև այդ վտանգավոր իրողությանը հակազդող տրամադրությունները, որոնք իրենց մեծարվեստ արտահայտությունն են գտել նաև <<Եղբայր եմք մեք>> բանաստեղծության մեջ.

Ի բյուր ձայնից բնության շրթեր
Թե երգք թոչին սիրողաբար,
Մատունք կուսին ամենագեղ
Թե որ զարնեն փափուկ քնար,
Չունին ձայն մի այնքան սիրուն.
Քան զանձկալի Եղբայր անուն...

Երգեցիկ տաղաչափությամբ ու երաժշտական շեշտադրությամբ հյուսված այս բանաստեղծությունը, չնայած զրաբար լեզվին, հետագայում, լայնորեն տարածվելով ժողովրդի մեջ, պիտի դառնար սիրված ազգային հիմներից մեկը:

Զգացմունքի ռոմանտիկական ազատությամբ ու անմիջականությամբ, արտահայտչական ձևերի պարզությամբ ու երբությամբ աչքի է ընկնում <<Փարուն>> բանաստեղծությունը՝ հայ հայրենասիրական քնարերգության ընտիր էջերից մեկը, որ անվանի երգահան Տիգրան Չոխաջյանի երաժշտությամբ հնչում է մինչև այսօր.

Ո հ, ի նչ անուշ և ինչպե՛ս գով
Առափոտյան փչես, հովի կ,
Ծաղկանց վըրա գուրգուրալով
Եվ մագերուն կուսին փափկիկ.
Բայց չես հովիկ իմ Հայրենյաց,
Քնա , անցի ր սրտես ի բաց:

Այսպես հայրենակարոտ բանաստեղծը հոգով անհաղորդ է մնում օտար թոչնիկի երգին, օտար առվակի զվարթ կարկաչին: Բայց

Թեպետ թոչնիկն ու հովն Հայոց
Ավերակաց շրջին վերա
Թեպետ աղվորվ վտական Հայոց
Նոճիներու մեջ կը սողա,
Նոքա հառաչք են հայրենյաց,
Նոքա չերթա ն սրտես ի բաց:

Բնության ու սիրո թեմաների բանաստեղծական արծարծումները Պեշիկթաշլյանի հայրենասիրական քնարերգության մեջ ձևային-արտահայտ-

չական դերակատարումից բացի, ուսեն նաև բովանդակային կարևորություն: Ամենից առաջ դրանք վկայում են բանաստեղծի քնարական աշխարհի միասնականության մասին, որ, ինչպես ամեն մի իսկական քնարերգուի ստեղծագործության մեջ, թեմաները, որքան էլ բազմազան ու բազմաբնույթ, մեկուսացված չեն իրարից, բխում են մեկը մյուսից, փոխադարձաբար պայմանավորված են մեկը մյուսանցով: Եվ բոլորը միասին մատնանշում են քնարական աշխարհագրողության մի ամբողջական համակարգ, որով բանաստեղծը զգում, վերապրում է շրջապատող աշխարհը իր անընդգրկելի բազմազանությամբ՝ հայրենիք, բնություն, սեր և առհասարակ մարդկային գոյությունը բովանդակավորող ամեն ինչ:

Այս տեսակետով դիտված Պեշկոբաշյանի պիեռն և բնության երգերը պարզում են մարդկային ներաշխարհի և բնական ու հասարակական միջավայրի հաղորդացության, գոյաբանական ընդհանրության քնարական մի մեկնակետ, որ նորություն էր ժամանակակից հայոց բանաստեղծության մեջ, թեև ժառանգորդական որոշ հանգույցներով կապվում էր հայ միջնադարյան քնարերգության ավանդույթների հետ: Այդ երգերում սերը ազատ է սատը կլսափցիստական կադապարներից, հանդես է գալիս ինքնադրսևորման անկաշկանդ ու բազմազան հնարավորություններով, բնությունը շողում է հազար ու մի գուներանգով, ձայների ու ձների անվերջ թրթռացող խաղերով, որոնք շուրջ ու կենդանություն են առնում մարդու ներքին ու արտաքին տեսողության ոլորտում: Պեշկոբաշյանի երգերում մարդու կոչման գլխավոր խորհուրդը էթե հայրենասիրությունն էլ է, ապա դա միայն ազգային-քաղաքացիական պարտքի անձնուրաց գիրակցություն չէ, հայրենիքը իբրև բարձրագույն արժեք, մարդը իր զգացմունքների հարստությամբ, բնությունը իր անչափելի գեղեցկություններով, անբաժան են իրարից, մեկը մյուսի շարունակությունն ու լրացումն է: Այնուամենայնիվ բանաստեղծի քնարական հայացքը չի նույնանում բնության պանթեիստական պաշտամունքի հետ, բնությունը՝ նրա քնարական տեսադաշտում ինքնակա արժեք է:

<<Ճենք ի լյառն հսկային>> բանաստեղծությունը գոյության հիմն է, լինելիության փառաբանություն: Միրահար գույզը բարձրանում է լեռնի վեր: Տեսարանները՝ մեկը մյուսից շքեղ, հաջորդում են իրար, հաճախ նկարչական գունագեղությամբ:

Հուր հեր արփվույն կըծավալի
Ի դաշտ, հարոտ գեղաժպիտ,
Շովն ի հերկինս կըգմայլի,
Երկինք ի ծով ծիծաղախիտ...

Շարժուն, անընդհատ փոփոխվող բնապատկերը կենդանանում է դրան

լիաբուխ ընդառաջ նետվող մարդկային ներաշխարհի թրթիռով, որ իբրև հանկերգ կրկնվում է յուրաքանչյուր տան վերջում.

Բաւ ք, հաճույք, փառկ թներ,

Տաւ ք զվեգ բըլուրն ի վեր:

Բնության գրկում իմաստ ու բովանդակություն են ստանում մարդկային գոյությունը, սերը: Գեղեցիկ կույսն էլ իր հերթին դառնում է բնության զարդերից մեկը: Այս գաղափարը նորանոր քնարական արտահայտություններ է ստանում Պեշիկթաշյանի <<Աշուն>>, <<Հալեմտաղըն այն գեղեցիկ>>, <<Ո՛ր էր թե զեփյուռիկ...>> և այլ բանաստեղծություններում: Մի դեպքում բնապատկերը պարզ միջոց է սփռո գզացմունքի խորությունն ու գեղեցկությունը ցուցադրելու համար, մի այլ դեպքում բնությունն իր գեղեցկություններով, մարդը՝ իր ներաշխարհի հարստությամբ, երկխոսության մեջ են, որի ընթացքում ականթարթոթեն լուծվում կյանքի առեղծվածը, իսկ երբ երկուսն էլ լռում են, խոսում են արդեն սրտերը.

Երբ բնությունն անխոս կենա,

Մահկանացուք ձայն չեն հաներ,

Լուռ է ամեն ինչ, որ շուրջ կա.

Ավելի տա ք խոսին սրտեր:

Պեշիկթաշյանի քնարերգությունը ռոմանտիկական գեղագիտության վավերական հաղթանակներից է հայոց նոր բանաստեղծության մեջ: Նրա ինքնուրույն և ինքնատիպ անհատականությունը ձևավորվել է ֆրանսիացի ռոմանտիկներ Լամարթինի, Ալֆրեդ դը Մյուսեի, Վիկտոր Հյուգոյի և ուրիշների դասական արվեստի մթնոլորտում, բայց ստեղծագործական նկարագրի աներկբա հայկականությունը խորքից շնչում է հայ բազմադարյան քնարերգության ոգով ու ոճով:

L.G.Gevorgyan - Themes of Motherland, Love and Nature in the Poetry of Mkrtich Peshiktashlyan

The article covers the romantic poems of Mkrtich Peshiktashlyan, apologist of the Armenian National Liberation Movement of 50-60s of the 19th century, particularly the series of "Zeytunyan erger" (Zeytunyan Songs), which were widely known in the Armenian poetry of that time. Peshiktashlyan's patriotic poetry was created in a unique genre of poetic publicism and is the direct response to both the poet's and the modern national identity issues.

ԳՐԱԿԱՆՈՒԹՅՈՒՆ

1. Ա.Թալանյան, Մկրտիչ Պեշիկթաշյանի կյանքն ու գործը, Փարիզ, 1907:
2. Ա.Ինճիկյան, Մկրտիչ Պեշիկթաշյան (Մ.Պեշիկթաշյան, Տաղեր, Ե., 1947, էջ 5-7):
3. Հ.Օշական, Համայնապատկեր արևմտահայ գրականության, հ. 2. 1953:
4. Ս.Արիկյան, Հայկական ռոմանտիզմ, Եր., 1966:
5. Վ.Սաֆարյան, Մկրտիչ Պեշիկթաշյան: Կյանքը և ստեղծագործությունը, Եր., 1972: